



internacional

GHISLAINE PAALMAN

NACI 4 AUGUSTUS, 1982

KEN

Mi a lanta na Savaneta te cu mi 14 aña y di ey nos a muda pa Sabana Blanco. Pa loke ta school mi a bay di Heilig Hart College pa Havo. Na 2001 mi a bay Valencia Community College na Orlando Florida, den e di tres aña mi a drenta UCF University of Central Florida. Na December 2004 mi a gradua cu mi 'Bachelor of Science den Business Administration', cu un 'major' den 'Economics'. Di ey mi a bay pa Stetson University na DeLand Florida, pa mi caba mi Master den Business Administration. Nos sistema na Aruba ta mas Americaniza. Si mi compara loke mi ta tende for di mi amistadnan cu a bay studia na Hulanda, mi ta haya cu ta mas facil pa adapta na bida na Merca como estudiante, compara cu Hulanda. 'Time Management' ta loke ta lo mas importante ora di studia den exterior. E transicion di clas di 30 mucha pa clas di 400 mucha a tumami 4 luna pa custuma. Loke si falta pa Merca ta e ayudo pa estudiante manera na Hulanda. Ora mi a yega no tabatin nada, afortunadamente cu ayudo di algun otro estudiante nos a logra lanta e DCSA, Dutch Caribbean Students Association na Orlando. Nan ta duna lezing den cierto temporada na Aruba. Nos ta purba di 'vang op' studiantenan cu ta bin Orlando. Awor tin como 70 estudiante na Orlando y tin otro nan ta traha ey of biba ey y e organisacion aki mester haya mas atencion y ayudo.

TRABOU

Mi no tin hopi experiencia, pero si mi sa suficiente cu mi ta sinti cu mi por yuda cualkier compania chikito of grandi mehora nan mes y prepara pa

sigui crece. Mi a traha na e Global Perspectives Office di UCF mes, asistiendo e president door di haci research y analysis. E Universidad ta bezig ta sigui expand 'reach' global. Nan ta siguiendo tur desaroyo na mundo. Tambe UCF ta traha riba un proyecto internacional na Ecuador, pa loke ta desaroyo di nan turismo. Aruba sigur por haci uso di e experticio aki y probecha pa haci research, analysis, consultancy y cooperacion.

Na Aruba mi a core stage na un compania. E hecho ta cu e compania aki no ta haci uso di e estudiante pa lague haci analysis y bin cu recomendacion. E pensamentonan di e 'hefenan' tin ora ta un tiki cera. Nos por contribui na haci procesonan mas eficiente, e systemanan cu mas ta rindi. Pues pa loke ta 'strategy planning' te ainda mi a mira cu ta companianan grandi so ta haci uso di nan y lo mi kier mira esnan mediano of chikito tambe hacie.

Nos a logra tambe cooperacion estrecho cu e staff di e Federal Reserve Bank y aki bo ta sinti na Merca e receptividad pa ideanan nobo of di hende yong, apesar di ta un instituto cu hopi experiencia. Mi mester a nenga un oferta di trabou cu Volusia County na unda Stetson University ta, pero como hende di afor mi lo mester a warda 9 luna prome cu bo haya e aprobacion final pa por cuminsa y mi plannan ta otro pa awor.

BOLBE ARUBA

Mi deseo ta pa bolbe Aruba manera mi haya e oportunidad. Mi lo kier cuminsa na cualkier compania na Aruba grandi of chikito, haciendo analysis y dunando consejo di e mihor rumbo pa hiba nan

compania. Na Juli di e aña aki mi ta bek na Aruba, pa bin tira un bista den mi vakantie. Como trahador tin ora bo ta parti entre gana mas experiencia internacional versus bolbe bo pais pa duna un contribucion, pues awor mi ta cla pa Aruba.

VISION PA ARUBA

Mi no ta sinti cu ta analiza e 'Mercado Aruba' manera mester ta, pa mira kico tin demanda p'e. Mi a ripara cu ta habri negoshi y vende producto sin bin cu un bon business plan. Poco negoshi na Aruba ta analisa nan 'customer satisfaction'. Hopi biaha nan tin miedo di hinca un tiki placa pa haya sa e realidad, pero a lo largo e semper ta cumbini e negoshi.

Un trend negativo pa nos isla ta cu Aruba ta muestra mas sushi cada biaha y esaki ta hacimi dolor. Esaki no tin nada di haci cu politica sino mas bien cu nos cumbiennan como un pueblo. Otro punto, tin hopi edificio pero poco mantencion di nan. Mi ta haya cu gobierno mester tuma un rol mas agresivo den nos educacion, mira e estado di schoolnan. Pa Aruba nos ta kere cu e drechamento di edificio di schoolnan cu nos a haci ta suficiente, pero ora bo bay school den exterior mi ta realisa dicon nos studiantenan ta demotiva. Ami tabata den e grupo cu a protesta basta aña pasa na Colegio y mi mes no a disfruta di dje, pero at least e studiantenan di awe ta un tiki mihor. Tristo pa mira e muchanan yong ta kibra nan lomba cu bukinan pisa, pakico no tin un sistema di locker. Pues mi meta ta pa contribui cu ideanan positivo na e crecimiento di nos pais. Ami ta hoben y mi ta sigur cu nos empresanan lo sa di duna nos talentonan hoben un chens pa contribui. 

